

ጳውሎስ ቲቶስ ፃፊዳ ኪታ ጋሳ ቆፋ

ቲቶይ አይሁዴ ጊዶና አሲ፣ ሺን ጉዩፔ አማኒዲ፣ ጳውሎስ ዎንጌላ ኪታ አሱዋ አሲያ ዎዴ ማታን ኢያ ማዲዳ አሲ። ሄ ዎዴ ቲቶይ፣ ዎሳ ኬሳ ዓላናዉኔ ናጋናው ቃርዔሳ ቢታን አቲስ። ሃ ኪታይ ሄሹ አይፌ ቆፋታ አይኬስ።

1) ዎሳ ኬሳ አይሲያ አሳይ፣ ኢታ ዱሱ ዴዲያ ቃርዔሳ አሳ ማታን አይ ሜላ ሎዎ ዱሱ ዳናው ኮሺያኮ ቲቶ አኬኪሴስ።

2) ዎሳ ኬሳ ጊዶን ዴዲያ ዱማ ዱማ ጩጋታ፣ ሄሲካ፣ ጩማ አሳታ፣ ያላጋ አዴታኔ አይሌታ ዋቲ ታማርሳናው ቤሲያኮ ቲቶ ዞሬስ።

3) አማኒያ አሳ አማኖ ዱሳባ፣ ሄሲካ፣ ሳርቴሳኒኔ ሲቆን ዳናባ፣ ዎሳ ኬሳ ጊዶሬ አሺ፣ ፓላማኔ ሻሆቴሲ ዲጋናባ ቲቶስ ዞሬ ኢሜስ።

ቲቶ ኪታ አይፌ ቆፋታ

ጌሎ ቆፋ 1:1-4

ዎሳ ኬሲ ካሌሲያ አሳ 1:5-16

ዎሳ ኬሳን ዴዲያ ዱማ ዱማ ጩጋታ አሶ 2:1-15

ዞሬኔ ናጊሶ 3:1-11

ኩሻ ቆፋ 3:12-15

¹ ዩሱስ ኪሪስቶሳ ሃዋሬይኔ ዎሳ አይሌይ፣ ጳውሎስ፣ ፃፊዳ ዳብዳቤያ። ዎሳይ ዶሪዳ አሳ አማኑዋ ዲቻናዳኔ ቱማ አያና ዴዑዋ ዋኒዲ ዳኔኮ ቤሲያ ቱማ ኤራኮ ኤንታ ካሌሳናው ታኒ ኪቴታስ።

² ሄ አማኖይኔ ኤራቴሳይ ሜሪና ዴዑዋ ኡፋይሳ ቦሳ ዜምፒስ። ሄሳ ዳር ዎዴፔ ሲንሴ ዎርዶቶና ዎሳይ ኑስ ኢማና ጊዲ ቃላ ጌሊስ። ³ ኑና አሺያ ዎሳይ ባ ዎዴን ሃ ኪታ አዳና ሜላ ታው ሃዳራ ኢሚስ።

⁴ ኑ ኮሴ አማኑዋን ታ ቱማ ናዓ ጊዲዳ ቲቶ፣

ዎሳ አዋፔኔ ኑና አሺያ ዩሱስ ኪሪስቶሳፔ አጾ ኬሃቴሳይ፣ ማርቴሳይኔ ሳርቴሳይ ኔው ጊዶ።

ቲቶይ ቃርዔሳን አሲያ አሱዋ

5 ታኒ ኔና ቃርፂሳን አጋዳ ዩዳይ፥ ኔኒ አቲዳባ ጊጊሳናዳኔ ታኒ ኪቲዳይሳዳ ካታማ ኡባን ዎሳ ኪሳ ጨማታ ዶራና ሜላሳ።
 6 ጨሚ ቦሬቶናይሳ፥ ኢሲ ማቼ አዚና፥ ማራ ዳዮን ዎይኮ ኪቲቱሳ ኢዎን አሲ ቦሮና አማኒያ ናይቲ ዴዒያ አሲ ጊዳናው ቤሴስ።
 7 ዎሳ ኪሳ ጨሚ ዎሳ አሱዎ ሃዳራ ኤኪዳ ጊሾ ቦሬቶናይሳ፥ አቶርቶናይሳ፥ ኤሌ ዩሎቶናይሳ፥ ማሶቶናይሳ፥ አዳ ሜዶናይሳኔ ቤሶና ጎዓስ ዳፌቶናይሳ ጊዳናው ቤሴስ።
 8 ሺን ኢማሴ ሞኬይሳ፥ ሎዎባ ኡባ ዶሴይሳ፥ አኬካንቾ፥ ዒሎ፥ ጌሺኔ ባና ሃሬይሳ ጊዳናው ቤሴስ።
 9 ሃራታ ሱሬ ቲሚርቲያን ሚንሴሳናውኔ ሄ ቲሚርቲያ ኢዌይሳታ ዛራናው ባ ታማሪዳ ቱማ ቃላን ሚኒዲ ኤቃናው ቤሴስ።

10 ኪቲቶናይሳቲ፥ ታሶና አዳ አዴቴይሳቲ፥ ጨሚይሳቲ ኡባካ ቃዓሬቴሳ ዎጋ ናጊያ ዳሮ አሳቲ ዴዎሶና።
 11 ኤንቲ ቤሶና አጊን ሚሼ ዴማናው ኮዩዲ፥ ታማርሳናው ቤሶናባ ታማርሲሼ ኪሳ አሳ ኡባ ኢሲያ ጊሾ ኤንታ ቲሚርቲያ ቱቃናው ቤሴስ።
 12 ኤንታ ናቤታፕ ኢሶይ፥ «ቃርፂሳ አሳይ ኡባ ዎዴ ዎርዶ አዴቶሶና፤ ኢታ ዶዓታኔ አዛላ ያራምባታ»* ያጊስ።
 13 ሃ ማርካቴሳይ ቱማ ማርካቴሴ። ሄሳ ጊሾ፥ ኤንታው ቱማ አማኖይ ዳና ሜላ ኤንታ ሃንቄታ።
 14 ቱማ ኢዒያ አሳ ቲሚርቲያኔ አይሁዴታ ታሶና ቶሲያ ሲዎና ሜላ ኤንታ ሴራ።
 15 ባንታው ጊሼ ጊዲዳይሳታስ ኡባይ ጌሺ፥ ሺን ቱናታሲኔ አማኖናይስታስ ኤንታ ቆፋይኔ ካሃይ ቱኒዳ ጊሾ ኤንታው አይቤካ ጌሺ ጊዴና።
 16 ኤንቲ ኑ ዎሳ ኤሮስ ጎሶና፥ ሺን ባንታ አሱዎን ኢያ ካዶሶና። ኤንቲ ዎሳን ኢዌቲዳይሳታ፥ ኪቲቶናይሳታኔ ሎዎ አሶ ኡባስ ጊዶናይሳታ።

2

1 ሺን ኔኒ ሱሬ ቲሚርቲያ ጳልቆና ቲሚርቲ ታማርሳናው ቤሴስ።
 2 ጨማ አዴቲ ባንታና ሃሬይሳታ፥ ዎፕ ጊዳይሳታ፥ ቦንቹቲዳይሳታ፥ አማኖን፥ ሲቆኒኔ ዳንዳዓን፥ ሚኖ ጊዳና ሜላ ዞራ።
 3 ሄሳዳካ፥ ጨማ ማጫሳይ ባንታ ዱሳን ጌሻታ፥ ዚጊሮናይሳታ፥ ዎይኔ ኡሻን ሃሬቶናይሳታኔ ሎዎባ ታማርሴይሳታ ጊዳና ሜላ ታማርሳ።
 4 ኤንቲ ሄሳዳ ሃኒኮ ያላጋ ማጫሳይ ባንታ አዚናታኔ ባንታ ናይታ ሲቃና ሜላ ታማርሳናው ዳንዳዎሶና።
 5 ዎሳ ቃላይ ቦሬቶና ሜላ ባንታና ሃሬይሳታ፥ ጌሻታ፥ ባንታ

1:6 1ዒዎ 3:2-7 * 1:12 ቃርፂሳ አሳይ ኡባ ዎዴ ዎርዶ አዴቶሶና፤ ኢታ ዶዓታኔ አዛላ ያራምባታ፥ ሄሳ ያጊዲ አዲዳ ናቤይ ኤጲሜንዴሳ ጌቱቴስ።

ሶን አሴይሳታ፥ ኬሃታኔ ባንታ አዘርታስ ኪቴቴይሳታ ጊዳና ሜላ ያላጋ ማጫሳ ታማርሶና።

6 ሄሳዳካ፥ ያላጋ አዳቲ ባንታና ሃራና ሜላ ዞራ። 7 ኔኒ ኔ ሁዔን ሎዎ አሶ ኡባን ኤንታው ሌሚሶ ጊዳ። ኔኒ ኔ ቲሚርቲያን ኤቁዳይሳኔ አማኔቲዳይሳ ጊዳ። 8 ኑ ሞርኬቲ ኑና ዘጊራናው ጋሶያባይ ኤንታው ዳዩን ኤንቲ ዩላታና ሜላ ኔኒ ቦሬቶና ሎዎ አዳ አዴታ።

9 አይሌቲ ኡባባን ባንታ ጎዳታስ ኪቴታና ሜላ፥ ኤንታ ኡፋይሳና ሜላኔ ኤንታራ ፓላሞና ሜላ ዞራ። 10 ኤንቲ ባንታ ጎዳታፎ ካይሶቶፖ፥ ሄሲካ፥ ኑና አሺያ ያሳ ቲሚርቲይ፥ ኡባ አጌን ዶሴቲዳይሳ ጊዳና ሜላ ባንታ አሲያ አሱዋን አማኔቴይሳታ ጊዴይሳ ቤሳና ሜላ ኤንታ ዞራ።

11 አሴ አሺያ ያሳ አዶ ኬሃቴሳይ አሳ ኡባስ ቆንጨስ። 12 ሄ አዶ ኬሃቴሳይ፥ ኑ ናጋራኔ ሃ አላሚያ አሙዋ አጊዲ፥ ሃ ዎዲያን ኑና ሃሪዲ፥ ቱማ አያና ዴዑዋኒኔ ዒሎቴሳን ዳና ሜላ ኑና ታማርሴስ። 13 ኑኒ አንጄቲዳ ኡፋይሳ ጊዲዳ ጊታ ያሳኔ ኑና አሺያ ዩሱስ ኪሪስቶሳ ቦንቾ ቆንጨሳ ናጎስ። 14 ኢታ አሶ ኡባሬ ኑና ዎዛናዉኔ ሎዎባ አሳናው አሞቲያ ባ ጌሻ አሲ ኬሳናው ኑ ጊሾ ባና አሲ ኢሚስ።

15 ኔኒ ሃይሳ ታማርሳ፤ ኩሜሳ ማታን ዞራ፥ ሴራ፤ አኒካ ኔና ካዶፖ።

3

አማኒያ አሳ አሶ

1 አሳይ ዴሪያ ሃሪይሳታስ፥ አዋቴሳይ ዴዔይሳታስ ሃራታናው፥ ኪቴታናዉኔ ሎዎ አሶ ኡባ አሳናው ጊጌቲዳይሳታ ጊዳና ሜላ አኬኪሳ። 2 ቃሲ ኤንቲ አዴ ቦላካ ኢታ አዴቶና ሜላ፥ ሳሮ አሲ ጊዳና ሜላ፥ አሽኬታኔ አሳ ኡባስ ካዴቴይሳታ ጊዳና ሜላ ዞራ። 3 ኑኒ ካሴ ኤያታ፥ ኪቴቶናይሳታ፥ ባሌቲዳይሳታ፥ ዱማ ዱማ አሾ ኡፋይሳሲኔ አሞስ አይሌቲዳይሳታ፥ ኑኒ ኢታቴሳኒኔ ቃናቴን ኩሚዳይሳታ፤ ኑ አሴ ኢዔይሳታ፥ አሲካ ኑና ኢዔይሳታ። 4 ሺን አሺያ ያሳ ኬሃቴሳይኔ ሲቆይ ቆንጨዳ ዎዴ 5 ኑ አሲዳ ዒሎ አሱዋ ጊሾ ጊዴናሺን ባ ማሮቴሳ ጊሾ ኑና አሺስ። ኑና ኢ አሺዳይ፥ ናምዓንሉ ዩሌቴሳ ሜቻኒኔ ጌሻ አያና ባጋራ ኢሚዳ አራሳ ዴዑዋና። 6 ሄ አያና፥ ያሳይ ኑና አሺያ ዩሱስ ኪሪስቶሳ ባጋራ ኑ ቦላ ዳርሲዲ ጉሲስ። 7 ባ አዶ ኬሃቴሳ ባጋራ ኑና ዒሲሲዲ ሜሪና ዴዑዋ ላታ ኡፋይሳ አይካና ሜላ ሄሳ አሲስ። 8 ሃ ቃላይ

2:14 ማዝ 130:8፤ ኬሳ 19:5፤ ዛሬ 4:20፤ 7:6፤ 14:2፤ 1ጴጊ 2:9

አማኔቲዳ ቃላ። ያሳ አማኔይሳቲ ሎዎ አሶ አሳናው ጊጊዳይሳታ ጊዳና ሜላ ኔ ሃ ቃላ ሚንሳዳ አዳና ሜላ ታ ኮያይስ። ሃይሳቲ አሴ ኡባስ ሎዎኔ ጎጫይሳታ። ⁹ ሺን ኤያቴሳ ፓላማፔ፣ ኮቻ ታይቦፔ፣ ካቻፊኔ ሂጌ ጋሶን ዴንዲያ አሻፊ ናጌታ። ሄሲ ጎጫኔ ዎጴይ ባይናባ። ¹⁰ ሻሆቴሲ ሜዲያ ኡራ ኮይሮ ዞራ፤ ናምዓንሶ ሃንቄታ ሄሳፊ ጉዩ ኢያፔ ሃካ። ¹¹ ሄሳ ሜላ አሲ ጌላኔ ናጋራንቾ፤ ኢ ባ ቦላ ፕርዴይሳ ኡራ።

ዉርሴሳ ዞሬ

¹² ታኒ ባልጎ ያን ሻጫናው ቆፒዳ ጊሾ አርፄማሳ ዎይኮ ቲኪቆሳ ኔኮ ኪቲያ ዎዴ ኔ ታኮ ኒቆጲሊዮና ያናው ሚና። ¹³ ሂጌ ኤሪያ ዜናሲኔ አጲሎሲ አጌ ቢያ ዎዴ ኤንታው ኮሺያባይ ፓጮና ሜላ ኤንታ ማዳ። ¹⁴ ኑ አሳይካ ፓሶና አሲ ጊዲዲ አቶና ሜላ ባንታው ኮሺያባ ዴማና ሜላ ሎዎ አሶ አሳናው ሚኒዲ ታማሮ።

¹⁵ ታራ ዴዲያ ኡባይ ኔና ሳሮ ጎሶና፤ አማኖን ኑና ሲቂያ አሳ ሳሮ ጋ።

ያሳ አዶ ኬሃቴሳይ ሂንቴ ኡባራ ጊዶ። አሚንዲ።

3:12 ሃ.አ 20:4፤ ኤፌ. 6: 21-22፤ ቆላ 4: 7-8፤ 2ባጥ 4: 12 3:13 ሃ.አ 18: 24፤ 1ቆሮ 16: 12

አራሳ ጫቁዋ ጎፋሳ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5